

■ CONVIVENZA

Stinà sco in asen

DA BETTINA CADOTSCH*

Nus avain tar nus a chasa gist in pitschen chagniel – in beagle dad indesch emnas. In segn caracteristic dals beagles è lur chau stinà. E gea, jau stoss propi dir, quai avain nus percurschi bainspert cura ch'il pitschnin è arrivà tar nus. Suentar l'emprim effect da «jö» èsi sa mussà che nus avain in chagniel cun in chau dir sco in asen. El fa tge ch'el vul. Jau hai per exempel passentà in entir di cun mussar ad el ch'el na dastga betg ir sin la pultruna. Pir suenter avair clamà 100 giadas «na» e «pfui» ha el cedì e chapì che la pultruna tar nus a chasa è tabu per el.

Cun questas scenas avant egl m'èsi vegni endament ch'era jau sun qua e là in uman fitg stinà. Quai ha cumenzà tar mai gia cura ch'jau era ina pitschna matta. Forsa ha quai era da far in pau cun mia ensaina. Jau na sai betg propi sch'ins po s'orientar tenor l'ensaina, ma jau sun in scorpium ed jau stoss admetter che las qualitads dal scorpium correspundan a mai. Jau sai adina tge ch'jau less e surtut sai jau adina tge ch'jau na less betg.

Uschia n'han mes geniturs betg gì mo simpel cun mai. Gia cura



ch'jau era ina poppa èn els s'accurschids ch'jau vom mi'atgna via, ch'jau fatsch mes agens sbagls e na dumond betg per mintga piculezza per cussegl. E sch'insatge era i fallà mettev'jau mezza puspè en urden tut, senza dir insatge. Uss è quai natiralmain puspè sa moderà e: nagina tema, jau na sun betg stinada sco in asen ed jau sai senz'auter far cumpromiss en mia vita.

Speranza na pensais vus ussa betg ch'jau saja enorm cumplitgada e ch'ins na possia betg vegnir a frida cun mai. Quai na constat in summa betg. Jau sun da l'idea ch'ins na po era betg dir ch'esser stinà è insatge negativ. Cler ch'i dess forsà pli paucas discussiuns sch'ins schess adina tar tut «gea» ed «amen». Ma per esser sincera crai jau ch'i saja er in avantatg sch'ins sa tranteren star en per si'opiniun e sias ideas. Sche tuts

fan adina mo quai che vegn dictà e quai che la maiortad fa na datti mai novs patrats. Esser stinà po perquai era sa pajar.

Sch'jau guard enavos sin mia uffanza schess jau ch'i fiss per franc stà pli simpel sch'jau avess qua e là dà suenter pli baud. Per exempel tar piculezzas cun mes fragliuns. I n'è franc betg mal sch'ins sa lascha tranteren manar per il maun. Ma in avantatg ch'umans stinads han è segr ch'els na sa laschan betg trair giu uschè spert e cumbattan per lur finamiras.

Meglier fissi però (sco dapertut en la vita) d'avair ina buna via da mez. Cumpromiss portan nus umans numnadain il pli lunsch. Oz sun jau persvasa ch'jau sun abla da chattar questa via, dentant era ch'jau vegn a mantegnair per vita duranta in pau mes chau dir.

Gist il mument stoss jau star stinada per tegnair cunter a noss pitschen beagle. Mes chau na dat numnadain betg suenter ch'il chaun è pli stinà ch'jau e ch'el dastga far chaussas ch'el na dastgass atgnamain betg.

* Bettina Cadotsch è creschida si a Savognin. Ella studegia Multimedia Production a la Scuola auta da tecnica e d'economia a Cuir e lavura tar Radio Südstschweiz.